

衢州文獻集成

〔子部〕

第
130
冊

國家圖書館出版社
National Library of China Publishing House

衢州文獻集成

黃靈庚 諸葛慧艷

主編

〔子部〕

第
130
冊

國家圖書館出版社

(明)徐應秋 撰

玉芝堂談薈三十六卷
(卷二十二至二十九)

清抄本

第一三〇冊目錄

玉芝堂談薈三十六卷(卷二十二至二十九)

(明)徐應秋撰
清抄本

.....

欽定四庫全書

玉芝堂談薈卷三十三

明 徐應秋 撰

四荒所屆

路史曰冥渤漲洋北天之所以限東徼也惡溪沸海北
地之所以阻南徼也陷河之設于西瀚海之設乎北此
天之所以遮西而制北者也激瘴霧于東維界黑水于
南極泄流沙于西陲決弱水于北荒此天之所以界四

維也春秋歷命叙人皇分九州神農甄別四海東西九
十萬里南北八十一萬里括地象八極之廣東西二億
三萬三千里南北二億三萬一千五百里淮南子禹使
大章步自東極至于西極二億三萬三千五百里七十
步監亥步自北極至于南極二億三萬三千五百里七十
五步吳越春秋禹東造絕迹西延積石南逾赤岨北過
寒谷徘徊乎崑崙察六尾青泉赤淵分入洞穴得金匱
玉符以鎮川瀆東至樽木日出九津青羗之野攢樹之

所據天之山爲崑崙之鄉窮髮帶方之地南至交趾
絲濮綿緇之域丹泉沸水之際南巢黃支之渚不死之
國西過三危之阨巫山之下飲露之民奇肱三西北至
太止之谷夏海之窮祝所之界禺強之里積水積石之
山爾雅東至于崑崙西至于邠國南至于濮鈇北至于
祝栗謂之四極蘇竹北戶西王母日下謂之四荒淮南
子東方之極自碣石過朝鮮貫大人之國東至日出之
次傳木之地青丘樹木之野太皞勾芒之所司者萬二

千里南方之極自北戶孫之界貫頰頤之國南至委火
災風之野赤帝祝融之所司者萬二千里中央之極自
崑崙東絕恒山日月之所道江河之所出人民之野五
穀之宜龍門河濟相貫以息壤堙鴻梁之洲東至于碣
石黃帝后土之所司者萬二千里西方之極自崑崙絕
流沙沉羽西之三危之國石城金室飲氣之民不死之
野少皞蓐收之所司者萬二千里北方之極自九函窮
夏海之所極北至今正之俗有凍寒積水雪雹霜霰漂

潤羣水之野顙頊玄冥之所司者萬五千里又曰九州
之外乃有八墳自東北方曰大澤曰無通東方曰大渚
曰少海東南方曰具區曰元畎澤南方曰大夢曰浩澤
西南方曰渚資曰丹澤西方曰九區曰泉澤西北方曰
大夏曰海澤北方曰大冥曰寒澤各方千里凡八墳八
澤之雲是雨九州八墳之外乃有八紘亦方千里自東
北方曰和丘曰荒土東方曰棘林曰桑野東南方曰大
窮曰衆安南方曰廣都曰反戶西南方曰儵僈曰炎土

西方曰金丘曰沃野西北方曰一目曰沙所北方曰積
水曰委羽凡八絃之氣是出寒暑以合八正必以風雨
八絃之外乃有八極自東北方曰蒼土之山曰蒼門東
方曰東極之山曰開明之門東南方曰波母之山曰陽
門南方曰南極之山曰暑門西南方曰編駒之山曰白
門西方曰西極之山曰閭闔之門西北方曰不周之山
曰幽都之門北方曰北極之山曰寒門佛經稱須彌山
東天下名佛波提一名東弗于逮縱橫九千由旬圓如

滿月人面如之壽三百歲西名西瞿耶尼縱橫八千由旬
彎如半月人面如之壽三百歲南名南閻浮提一名
南瞻部洲縱橫七千由旬北廣南狹如車箱人面如之
壽百歲北名鬱單越洲縱橫十千由旬四方正等人面
如之壽千歲長倍三天下人四洲統名娑婆世界又成
光子云中天竺國東至震旦五萬八千里南至金地國
西阿拘遮國北至小香山阿耨達池各五萬八千里雲
笈七籤與放品經載東方弟子岱九萬里之外極豪林

之墟其國名呵羅提之國國地形正圓其色如碧脂之
鮮人長二丈壽四百歲南方閭浮利三萬里之外極洞
陽之野其國名伊沙陀之國國地平博無有高下土色
如丹人長二丈四尺壽三百六十歲西方俱耶尼七十
萬里之外極浩素之墟其國名尼維羅綠那之地形多
高壠與天西關相接土色白如玉人長一丈六尺壽六
百歲北方鬱單越五十萬里之外國極朔陰之庭其國
名旬羅地之國國地長流平演土色黑潤人長一丈二

尺壽三百歲上方九天之上清陽空虛之內元精膏液
自然之國以青氣為世界上極無窮四覆諸天則高上
玉皇萬聖帝真受生之根元壽命無量惟劫為年中國
極大風澤去地五百二十億萬里網維地源制使不落
土色如金之精國名太和寶真無量之國法苑珠林第
一北鬱單越其土正方有大樹名菴婆羅地生軟草盤
紫右旋色如紅翠香如婆師軟若天衣甚柔軟以足踏
地地四四寸舉足還復地平如掌四面有四阿耨達池

地純衆寶常有自然杭米如白華聚有自然釜鎮有摩
尼珠名曰燄光置于鎮下飯熟光滅有樹名曰曲躬蔭
葉相次天雨不漏諸男女止宿其下有香樹出種種衣
食嚴身之具彼人民洗浴注已遇衣便着不求本衣次
至香樹樹為曲躬其人手取樂器調絃娛樂其土中夜
阿耨達龍王起清淨雲而降甘雨其人起欲心時熟視
女人彼女隨逐往詣園林其人是彼男子骨肉中表不
應行欲者樹不曲蔭各自散去若非親者樹則曲蔭隨

意媒樂彼人命終莊嚴死屍捨之而去有鳥名憂慙憐
伽接彼死屍置于他方其地有二中洲一矩婆洲二憐
拉洲第二東帝子逮其土正圓有大樹名伽藍浮其洲
邊有二中洲一提河洲二毗提河洲自不殺生有自死
者則食其肉人無黑色餘同閻浮提第三西俱耶尼土
形如滿月有樹王曰斤提于彼樹下有一石牛以此因
緣名瞿耶尼此云牛貨牛貨洲邊有中洲者一捨提洲
二嚧怛羅漫里等洲彼土人間閻浮提第四閻浮提土

南狹北廣有大樹王名閻浮提於此樹下有閻浮那檀
金聚復有金翅鳥五樹名俱利胝婆羅阿修羅王有樹
名曰善盡人壽百歲中天者多順正理論云南瞻部洲
有邊洲一名遮末羅洲一名茂羅遮羅洲鄒行謂九州
之外又有九州東南神洲曰旦土正南邛州曰沃土西
南戎州曰滔土正西余州曰并土正中冀州曰中土西
北台州曰肥土正北濟州曰成土東北咸州曰隱土正
東揚州曰申土而神州為中國自有九州漢人採之作

河圖括地象近西洋耶穌教稱天下總分五大洲一曰
亞細亞中國四夷天竺回回國居此內南至沙馬大臘
呂宋等島北至新增白蠟及北海東至日本島大明海
西至大乃河墨河的湖大海西江海小西洋二曰歐羅
巴則大西諸國居焉南至地中海北至卧蘭的亞及米
海東至大乃河墨河的湖大海西至大西洋三曰利未
亞黑人國在此南至大浪山北至地中海東至西江海
仙勞冷祖島西至河相亞諾滄四曰北亞墨利加與亞